

qu'ils possédoient dans leur captivité, que Dieu leur eust donné vn homme qui leur seruoit & de pere & de mere, de consolateur & de tout, en vn lieu où toute consolation leur manquoit, sinon celle que Dieu leur donnoit par sa bouche. Il alloit souuent les confesser & les instruire, en vn mot il faisoit l'office d'Apostre, & pouuoit dire après S. Paul, *Verbum Dei non est alligatum, ideò omnia sustineo propter electos*. La parole de Dieu ne peut estre captiue, & ie souffre tout pour le salut des ames predestinées, que Dieu a choisies & mises en liberté par mon moyen au milieu de mes liens & de leurs chaînes.

Nous ne sçauons pas où tout cela aboutira, & iusqu'où ces barbares luy permettront de viure, seulement sçauons nous qu'il attend la mort de iour en iour & [22] d'heure en heure, & que tandis qu'il luy restera vn brin de vie il l'employera pour l'auancement de la gloire de Dieu, & fera vne Mission plus glorieuse que la nostre au milieu de nos plus cruels ennemis, puis qu'elle y est plus remplie de croix & heriffée d'espines. *Sugit mel de petra, oleumque de saxo durissimo*. Il n'appartient qu'au grand Maistre que nous seruons de tirer des amertumes la douceur, & de fléchir les cœurs plus endurcis que la pierre & le diamant.

L'obmet des choses bien considerables qui font arriuées à cette Eglise souffrante dans la seruitude des Iroquois. Je ne parle point aussi de la mort d'vn de ces deux François qui furent pris captifs avec le Pere, & lequel fut tué sur la fin de l'Automne par la passion d'vn particulier Iroquois; Je crains de repeter icy ce qui en auroit esté dit dans la Relation de Kebec, & me reserue à l'an prochain à en rapporter dauantage,